

EGD

- **Šta je EGD?**

Ezofagogastroduodenografija je radiološka metoda kojom se ispituje jednjak, želudac i početni dio tankog crijeva.

- **Da li postoji rizik po pacijenta?**

Tokom ove pretrage bićete izloženi većoj količini rendgenskog zračenja nego pri standardnoj radiografiji. Vrijeme izlaganja zračenju u velikoj mjeri zavisi i od Vaše saradnje pri pregledu.

VAŽNO: Obavezni ste upozoriti ljekara o mogućoj trudnoći jer primjena zračenja u trudnoći može štetiti plodu. Ako planirate trudnoću, najbolje bi bilo obaviti pregled u prvih 10 dana ciklusa da bi se izbjeglo štetno dejstvo zračenja na eventualno početnu trudnoću.

- **Kako se pripremiti za EGD?**

Uspjeh rendgenskog pregleda jednjaka, želuca i crijeva zavisi od Vaše pripreme za pregled. Osnovno je da dio probavnog kanala koji treba pregledati bude prazan. Zato ne smijete ništa jesti ni piti na dan pregleda. Zabranjeno je pušenje cigareta 2-3 sata prije pregleda, a 48 sati prije pregleda ne smijete uzimati ni lijekove koji sadrže teške metale.

Obavezni ste doći 20 minuta prije zakazanog pregleda i ponijeti sa sobom sve nalaze (u formi teksta i slike) vezane za Vaš zdravstveni problem.

- **Tok pregleda**

Ova pretraga nije bolna. Trajanje pretrage je individualno, a kreće se od oko 30 minuta pa do 2 sata (ukoliko je pretragom obuhvaćen i pregled tankog crijeva).

- Nakon što ste predali uputnicu na šalter Kabineta za klasičnu radiologiju, tehničar će Vas prozvati i uvesti u kabinu za presvlačenje. Upoznaćete Vas ukratko sa tokom pregleda, provesti do prostorije gdje se nalazi aparat za snimanje i postaviti Vas na sto za pacijenta.

- Sto za pacijente je pokretan, a njegovo kretanje kontroliše ljekar - radiolog. Prilikom promjene položaja stola iz vertikalnog u horizontalni i suprotno, bićete blagovremeno obaviješteni da biste se radi Vaše sigurnosti pri kretanju mogli pridržati za držače na stolu.

- Za vrijeme pregleda bićete sami u prostoriji. Ljekar i tehničar će Vas pratiti kroz prozor iz susjedne prostorije. Sa njima ćete moći da komunicirate putem interfona.

- Na početku pregleda ljekar će Vas zamoliti da pijete kontrast (rastvor barijum-sulfata) koji oblaže probavne organe i na taj način omogućava njihov prikaz. Kontrastno sredstvo je neprijatnog okusa.

- Tokom pregleda ljekar će Vam davati upute („zadržite dah“, „dišite“,...), koje ste dužni pažljivo slušati i ispoštovati. Ljekar će na monitoru pratiti kretanje kontrasta kroz Vaš probavni trakt postavljajući Vas u različite položaje (na lijevi bok, na desni bok, na leđa,...).

- Nakon završenog pregleda, tehničar će Vas ponovo uvesti u kabinu za presvlačenje.

- **Šta se dešava po završetku pregleda?**

Poslije pregleda možete da nastavite sa uobičajenom ishranom i uzimanjem lijekova. Kontrast koji ste popili izbacićete iz organizma putem stolice. Stolica može biti rjeđe konzistencije i nešto svjetlije boje.

- **Kako preuzeti ljekarski nalaz?**

Radiološki izvještaj/nalaz pacijent preuzima na šalteru Kabineta za klasičnu radiologiju nakon što radiolog interpretira nalaz.